

Schwarz-Schilling: Investicije donose radna mjest



Najbolji način da se prenese istina o pozitivnom uticaju direktnih stranih ulaganja jeste da se pokaže koliko je novih radnih mjesta otvoreno zahvaljujući takvim ulaganjima, rekao je visoki predstavnik i specijalni predstavnik EU Christian Schwarz-Schilling, obraćajući se poslovnom skupu večeras u Sarajevu.

Gospodin Schwarz-Schilling je priznao da se ova veza ne može precizno utvrditi, ali je pozvao Agenciju za promociju stranih ulaganja da napravi procjene koje će ukazati na vrijednost direktnih stranih ulaganja, možda na tromjesečnoj osnovi, te da pokaže koliko je radnih mjesta stvoreno odnosno osigurano kao rezultat ovih ulaganja.

“Ovo je neophodna inicijativa, jer sve dok javnost općenito, a birokrate naročito, ne shvate ključnu ulogu direktnih stranih ulaganja u stvaranju novih radnih mjesta (već se u nekim situacijama čak potpuno protive takvim ulaganjima), Bosna i Hercegovina će i dalje zaostajati za svojim susjedima u nastojanjima da privuče strane investitore”, rekao je gospodin Schwarz-Schilling.

Visoki predstavnik i specijalni predstavnik EU je upozorio da mnogi građani Bosne i Hercegovine još uvijek ne shvataju da investicije donose radna mjesta. “Stotinama hiljada građana, investicije se često ne čine tako korisnim. Često se dovode u vezu sa privatizacijskim prevarama, sa dalekim i nepoznatim vlasnicima nad vrijednim resursima, viškom radne snage te odsustvom odgovornosti vlasnika.”

“Mišljenje javnosti o direktnim stranim ulaganjima se mora

promijeniti zato što je organima vlasti potrebna šira podrška građana za mjere koje moraju poduzeti kako bi povećali strana ulaganja. Zašto bi birači podržavali nastojanja da se poboljša poslovno okruženje, ako se ne stvori direktna veza između tih nastojanja i stvaranja novih radnih mjesta?" upitao je gospodin Schwarz-Schilling. "Mora se također promijeniti zato što je investitorima potrebno da građani shvate i prihvate promjene, koje su nekada veoma teške, ali neophodne kada investitori pokušavaju preustrojiti preduzeće."

Visoki predstavnik/specijalni predstavnik EU obratio se na ceremoniji dodjele nagrada *Investitor godine za 2006. godinu*, u organizaciji Agencije za promociju stranih ulaganja BiH.